



Alijine sarajevske minijature (8)

Iz knjige „Sarajevski nekrologij“, Alije Nametka

Rukavice i sifilis

6.februar, 1961. godina

S Bašagićem sam se upoznao kad je on bio težak bolesnik od tabesa (sifilis, NF). Već sam o tome pisao u Novom Beharu i Hrvatskoj reviji, ali ovo ne objavih nigdje. Nakon možda i jednu godinu po našem upoznavanju, pričao mi je u nekom tugaljivom raspoloženju o porijeklu svoje bolesti. Dobro se sjećam da je rekao: „Sve je ovo meni zbog jednih rukavica.“

Bilo mi je neshvatljivo, a onda je on uzeo da govori kao da sam sa sobom govori:

„Baron Kučera je svake godine preko zime sazivao sijelo i balove, na koje je redovno zvao moga rahmetli oca, a kad sam počeo studirati, onda i mene. Tu je bila krema sarajevskog društva. To se dogodilo jednog ramazana. Otac rahmetli ne htjede da ide, a ja navalió da idem. Otac me odvráćáše da ne idem, zbog ramazana. Govorio je - bit će sijela i iza ramazana, pa ćemo onda otići. Ali ja se ne dadoh smesti. U oca su bile jedne krasne sive rukavice od hiršledera, pa ih ja uzeh. Nešto mi se izvanredno sviđalo. Bio sam u crnini, kako se i išlo na ova otmjena sijela. Tokom jedne plesne tačke prolazio sam između plesača, a kako su mi one rukavice bile na rukama činilo mi se da su svi zurili u mene. I zbilja sam čuo dok su prolazili mimo mene, kako se sašaptavaju, i jasno sam razabirao riječi Hanschuhe, Hanschuhe. Vidio sam da nitko ne nosi sive rukavice i frak i strašno mi je bilo neugodno. Iako je bio ramazan, odoh u pokrajnju sobu, u buffet, i počeh piti vino. Iza toga već podnapit odoh u kupleraj, gdje nađoh svog kolegu sa studija Zaharadku. Dođe nam kupler i počeh hvaliti dvije cure koje je istom dobio iz Beča. Rekosmo mu da ih dovede. Zbilja bile su obje lijepe, ali jedna mi se osobito

ALIJINE ISKRICE

Autor Administrator

Srijeda, 23 Travanj 2014 18:11 - Ažurirano Srijeda, 23 Travanj 2014 20:26

svidjela. Htio sam s njom ići u sobu, ali me stade Zaharadka moliti da je njemu prepustim. Navalio na me pe ne popušta i ja mu je prepustim, a s onom drugom odoh u sobu. Prođe nekoliko dana, a u mene se pojavi glavobolja, a poslije se ustanovi da je to sifilis. Dobivao sam Salvarzanove injekcije, ali ne istrajah do kraja, nego kad mi bolje, prekidoh s liječenjem. Eto, vidiš, sve je ovo meni zbog tih rukavica.“

(pripremio Nadan Filipović){jcomments on}